

## 納稅總動員

劇中人:阿麗(甲)阿源(乙)

甲:今仔日的風透透,阿公的面臭臭,代誌有影遮呢煩,莫怪心肝會結規丸。

(一面行一面唱)

乙:人講:「火燒豬頭」-「面熟、面熟」,頭前彼的人敢毋是隔壁班的阿麗仔?  
看伊那哼那行,敢講是咧喙齒疼?

甲:喂,阿源仔,妳哪會佇遮!我心內鬱卒才想講欲來揣你開講,無想著「講曹操,曹操就到」,妳真正是我腹肚內的面蟲!

乙:咱著先共逐家請安一下,等咧才閣來講。

甲:我是阿麗

乙:我是阿源

合:逐家好!

乙:是講阿麗啊,你生做嬌嚙嚙、人緣好,厝內底的人攏共你惜命命,哪有  
啥麼苦衷佻心聲?

甲:毋是我啦!講來話頭長,攏是阮兜上蓋疼我的阿公啦!

乙:可憐喔!是講恁阿公今年嘛已經七十外矣,人生這條路早慢攏愛行的,你  
毋通閣傷心啊!

甲:呸!呸!呸!你是咧講啥麼五四三?阮阿公身體健康、行路有風,人猶勇 khi  
àn-khiàn,你的喙毋通遮爾賤?

乙:好啦!我較歹勢、你較毋著!是你一句講就袂曉話,才會害我「目睷花花,  
匏仔當做是菜瓜!」無你嘛講較詳細咧。

甲:阿就昨暝阮阿公講:「四月牌照稅才納煞,這個月連鞭閣有房屋稅、所得  
稅,算算咧愛開幾佰十萬!」,講著這個搶錢的政府,伊就氣怱怱,害我  
毋知欲按怎?

乙:恁阿公真正是「十二月天睷厝頂」-「凍霜」!若這,我就愛替政府講幾  
句仔良心話。

甲:人講:「心穰無人知,喙穰上厲害!」我看你才是矮人跔厝頂-欠梯!阮阿  
公是一个安份守己的生理人,你毋通烏白講呢!

乙:來來來,耳空跔過來,今仔日我就開破一寡道理予你知。

甲:無彩咱是好朋友,我看你是「北港媽祖蔭外香」,有話緊講!

乙:講著恁阿公的底細,出門坐 BENZ 掛露螺,別莊大樓滿四界,生理好甲踢

倒街，所以政府扣稅才會遮爾濟！

甲：豈有此理！阮阿公駛的車、蹠的厝恰伊的財產攏是骨力勤儉趁來的，政府叫伊納遮濟稅金哪有公平？

乙：啥麼汽油煮米？我看你是食米毋知米價！人講開門七件事，柴、米、油、鹽、醬、醋、茶，咱政府欲建設，若無錢哪有法度？閣再講，國家若無安定，百姓哪有法度趁錢？

甲：聽起來閣有淡薄仔道理，親像咱政府欲辦健保、年金，抑是起學校、公園、鋪橋造路，真濟代誌，有影攏愛開真濟錢！

乙：無剉-規樣好好。除了你講的牌照稅、房屋稅、所得稅以外，猶閣有營業稅、貨物稅、印花稅、契稅…幾佰十種呢！

甲：莫怪有人攏講「中華民國萬萬稅！」是講：「全民若是一條心，烏塗嘛會變黃金！」為著咱台灣的未來，逐家一定愛納稅！

乙：真正是「三房兩廳」-「好聽」！所以講親像恁阿公這種「尻川鬥掃帚」-的「好額人」，若是會當配合政府來納稅，對咱國家的財源一定有真大的幫助！

甲：好啦！好啦！莫閣談阮阿公仔啦，你實在是「甘蔗規枝齧」-「無站節」呢！阮阿公上疼我，我一定會轉去共伊講予清楚啦！佇遮咱嘛愛拜託逐家門陣做伙來支持納稅！

甲：納稅做伙總動員，予恁囡孫代代中狀元

乙：老實申報好子弟，予恁囡孫趁錢蓄田地

甲：我是阿麗

乙：我是阿源

合：落台行禮！